

**Unipkagiyait uma Kitikmeot Inuit Katuyikatigit
Togliata Angayokangata (Innulikiyiit
iliitkuhilikiyiitlu) Lawrence Otokiak tatvani
2026-mi Kitikmeot Havagiyaoyonik
Kungiaktitingmata February 20, 2026, tatvuna
Uktaotaovalialiktitlugo tahamna
Ukkiuktaktumi Avatingnik Nanminikaohiat**



Uvanga Lawrence. Inuinauyunga. Nunakaktunga tahamani Ikaluktutiami.

Tahamani nunnami pamighakhimayunga. Taimaataok ajikuhiokhugo ilviit pamighakvigiyataok. Tahaffuma annugip iliitugipkakhimayanga. Hapkua innikniotipta ayogiktokhimayanga. Tahaffuma nunnap hakkugikhipkakhimayanga.

Tahamani mannikami innunguktitaohimagangavit, ilviit ikkayotighanik uttiktitagiakakmiyatit.

Nutagaovlunga, tohakhimayatka tahapkua kablunaat ukakhimayot Ukkiuktaktumi Avatingnik Nanminikaohiatnik. Ukkautigihimayait tahapkua titikniliokhimayut, kavamatkut tatvalu nanminiktaohiitnik. Uvamnut tukkihiyaga kavamalikitjutinik ukkaotikagahugiyatka. Ungahiktomiotattut ihomagihimayatka.

Kihiani tahamani, avatingnik nanminiktaohik ayungnaitok. Illihimayagiakagapta kakugo aullagiakakmangata. Illihimayagiakagaptitku hikku ingilgaviginiaktavut nangiaknaigiagha. Illihimayagiakaghuta avaghaktitiyagiakaknikmik angutiptingnik. Kauyimayagiakaghuta annamatjutikhaptingnik. Tahamna nuna maniliokutaongitok, kihiani munagitiagiakaktavut.

Tahamna munaginahoaknik ukkumaitok.

Hadja ukkauhigilakniaktatka tahapkua, takkuuk tahapkua hamalatkut. Takkutiagahoaklugit, kitkuvat tahapkua attiliokataktot titikanik? Kitkut ataniktoivakpat manighagiyaoyoghanik? Kitkut ihomaliokpaktot?

Inuinauvat hivuliktut tahamani Ikaluktutiami? Uvalunin innaullikpalialikita tahamani nunagiyaptingni?

Tahamna ukkautigiyaga akkiniangitarka inuit humilikak. Kihiani ihomagivlugo tahamna hannaighimanik. Hapkua Innuinait hannaighimangitpata hivuliknikut, kinattuinaak piyunnaktok. Taimatot tahamna nanminikauhik hakkukpaktok, uppihimangitpata, nipainganginaakluni pihimaitok.

Inuit nutpalialiktot Ukkiuktaktumut taunanga kablunaat nunaitniit autsaimmit, ahinniit hilakjuamiit. Hannaighimavlutik taivaktot. Ilihatiaghimavlutik tahamungakpaktot. Havaghamik uktugangamik ayungitamingnik ilihakhimayamingnik atokhutik havanikpaktot. Huokli? Havanikpaktot hannaiyakhimagamik.

Hannaiyaghimangitkupta, ukkamilugiakangitugot, Havakhat angmaumagangamik innuniktikpaktot, taimatot tahamna aolatjutaoyok hannahimayok.

Hapkua Inuinait ataniktoingitpata, manilikinikut ataniongitpata, parnaiyaiyiongitpata, aivayiongitpata, maiyaongitpata, tatva ingilgangitugot, ingilgangitkupta, tighiktutot innaghiktugot. Taima tighighuni kayangnakpiaktok, tighighuni nunnalitpaktut uppautiyomangitaminnut.

Una naunaitok okpiknakhuni. Tatvanikataungitkovit ikpanmi, imakaak nikkikhauyungnaghiyotit.

Uvagut taimatovalaak ihomagiyakangitugot tunnighihimainaaklota kivgaktonginnaklota. Uvagot pikataoyagiakaktugot tatvani ikpatimiikataoyagiakaktugot ihomakhukataolota, nanminikagiakaktugot, akkiliktoihimaitomik, atogaffukhimaitomik.

Nanminigilugo piyagiakaktugot.

Tatva nanminigigungniok una ikpaat, ihomaghukniaktutit kitkunik kaikuiniaktanik, ihomaghungniaktutit hunnamik nigginiaktuhi. Ihomaghugiakaktugot hunnanik happunmiyagiakaktugot, tatva taima tahaman avatingnik nanminikaohioyok.

Ublumioyok, amihuvalaaktot tahapkua pimagioyogaloit ihomalioktaohimayot kihiani ihomalioktaohimayot kitkungnit kaoyimangitiaktuniit Inuinait innuhiitnik. Maligalioktaohimayot takkuminaktugaloit titikami, kihiani ihoilutaolguuktot nunaliitni. Manilikitjutit takkuminnaktugaloit nahautait, kihiani nakkugutaungitot innuhiptingnun. Taimaituvut tahapkua iliitkuhiktoktakut tatvalu ataniktotivut aviktaogangata, tahamna aviktotaohimayok hugguktikpaktok .

Tahapkua inolgamiotivut ukkaotiyomayatka tatvani nallakataoyot: tahamani innuhimagaloakluta tatvainaoyagiakangitok, tahamna Avatinnik Nanminikaknik ilingnun tunniyaonginnangitok. Hannaiyagiakaktotit, ilihagaloalohi Inuinauyuhi huli, tahamna ilihaknik hakkugighivaliotiginiaktat. Iliititjutiginiaktat hannalgutikhaknik, kaoyimakpaliotiginiaktatit. Ihummat iliitpalikluni ayogoikniagavit. Iliitogitjutiginiaktatit ayogoiklotit taigoaknikmik angikutaohimayonik. Pitjutiginiagakni appikutikaklotik tahapkuninga maligaknik, tatvalu akinniakutilugit tahapkua ihomalioktaohimayot.

Ilviit nanminigiyomagungni tahamna ikpaat, ayoighagiakaktutit ikpatiliokaaklotit.

Tatva innikniit tahamani nallaktot ukkautiyomayatka: hannaiyagiakaktavut hapkua inolgamiotivut. Ukkaotikatagiakaktavut. Niggioyagiakaktavut ayogoikniakmata. Ilihaotingitkuptitku hannaiyaklogit, kitkut allaat haavinniaktot, tiklingniagahoangittugaloit kihiani taimainaktok hannaiyangitkuptitku.

Tatvalu tahamna avatingnik nanminikaknik hakkuikpaktok taimainiakat innakhikluni hannaiyaghimaitomik.

Humangitugaloak kaplunaat kitkuttoinait tikkikatakniaktot tahamunga Ukkiuktaktumut, kihiani ihuangitok uvagut Inuinauvluta hannaiyangitkupa hivuligiptingni tahamani nunagiyaptingni. Taima ukpiknaktok. Kovianaitogaloak, kihiani tahamna koviahutaongitkaloaktitlugo hakkugighivaliotaovakmat. Tahamna niamgiyaaknik pitjutaongitmat.

Tahamna avatingnik nanminikaknik happunmiaktaungitok ningaomanikut. Happunmiaktaoyok ayunghangitagangata, nallatiaknik ukkautjigiyaminnik, hannaiyaghimallunilu. Tatva Inuinakniit kaoyimatiaktuniit iliitkuhiktotitnik tatvalu ataniktotitnik, kaoyimayakaktuniit pitkuhioyonik tatvalu nanminikaohiknik, tahapkua nangikataoyungnaktot humilikak katimakataoyuni ikpigiyakangitovlutik mikkivallaaknikmik.

Tahapkua Inuit nanminikagamik ikpatikmingnik.

Hadja nallagitti, tahamna pimagiongmat. ATTAA tahamna Avatingnik Nanminikaknik nippaingaaktok, takkunaktok kinnaomangat attilioktot titikanik, takkunaktok kitkunni ataniktoiyuni manilikitjutitnik, takkunaktok kitkuni ataniktoiyuni.

Hapkua Inuinait hannaighimaitpata, kinnatuinak tatanni ihomaghukniaktok, naagohungitugalluit uvaptingnik, kihiani hannaghimatiaghimagamik, tatvalu uvagut parnaighimangitnapta .

Tahamna allangugiakaktok, hukkaigalluakluni, hakkugiklunni, nallatiaklutik ukkautjigiyamingnik, ilihatiakhimalutik, iligahukhimaitomik.

Uvagut mippilaitugot ighivaotaghaptingnik, uvagut hannaniaktavut una ikpatighavut, hannaiyaklugulu una ikpaat, hunnanik nikkighanik ihomaghukniaktugot, nanminiginiaktavut una ikpatiloghimayavut.

Tahamna nuna nanminigiyavut, kihiani nanminiginiaktavut hakkugikupta hivuliknikut.

Hannaiyagiakaktugot tamapta, hivumut aplukluta, uvagut munagiyagiakaktavut, immaimtat tahamna Inuit hivunighagiyaat avattiit nanminiginiaktait ahinni unghiktumi ihomaliolaitmatjuk, kihiani tahamani uvagut ihomaliogiagagaptitku tahapkua.

Imaitmat nanminingitkuviuk una ikpaat, ihomaghulaitutit hunnanik nigginiaktutit, taima nikkighanik ihomaghulaitkuvit, ihomaghulaitutit hivunighaknik.

Tahamna ukkauhigiyaga uvamnik ihomagiyatka unipagiyatka. Tujukniaktaga una Nunavut Kavamatkut Hivuliktia tittikitlugu tahapkuninga ajikutaitnik ukkauhigiyakma naunaiyaklugo tahamna ihagianaktok happuniagiakaktavut tammaktailinahuaklugo Inuinait ukkauhiat ihomagivlugit tahapkua ukkahigiyatka ublumi. Appigiyaohimagama Hivuliktiup havakvianiit hunnanik illaliutiniakigo havagiyaghaitnik hivummuniaktitlugit. Tahapkua ukkautitka titigakhimayatkalu uvamnik ihomaghutigiyamnik tunnighimatjutigiyatka. Niggioktunga Kavamatkut nallaktugauvuut tahapkua huuk ukkauhigiyatka.

Koanakpiakuhi.

